

反詐騙 165

阿麗：（歡頭喜面趲趲念）嘿！我是~先買一粒十『克拉』的鑽石、名牌的皮包，抑是先來環遊世界…。

阿財：阿麗！阿麗！（攞手），（走相倚）喝：阿~麗！

貴人：阿財 貴夫人：阿麗 上台行禮

阿麗：（驚惶大聲喝）你這個摺壁鬼，是欲共我驚死諾（hioh）！

阿財：我看你歡頭喜面，無~是有啥物好空嘛鬥相報咧！

阿麗：乎！好狗莫鎮路，是無看著我咧無閒，閃啦！閃啦！

阿財：緊行無好步，你是食不著藥仔？聲嗽遮邇耪，俗語講有理走遍天下，無理寸步難行。

阿麗：我毋管你是內裡抑是外裡，我咧趕時間，無閒共你拍拈涼。（啦… 啦）

（阿財對阿麗金金相，阿麗相閃無愛予阿財看。）

阿財：天靈靈！地靈靈！根據我的靈感，你印堂烏赳赳，目睷神怪怪，噃~你愛細膩，若毋是見血光，就是愛破財消災！

阿麗：呸！呸！呸！你這種半仙見講毋好話，三講擱四毋著。我今仔日心情好，毋愛佢你計較，唉叻喂！袂赴矣啦。

阿財：你看我殍殍，我看你霧霧咧，明明是愛破財，無~敢講正經是著頭獎？我算無著！咦？按怎看攏無成咧。

阿麗：你這個人真正是雞仔腸鳥仔肚，怨妒別人好運欲做好額人，好啦！我坦白共你講，我~著大獎欲出運矣！另工你愛叫我貴夫人~貴婦阿麗。

阿財：誠實喔！那按呢貴夫人阿麗小姐，今嘛欲去銀行轉帳，著否？

阿麗：夭壽喔！你袂輸我腹肚內的蛔蟲，臆甲準準準，有影是半仙。

阿財：上無過橋較濟你行路，食鹽較濟你食米。像恁這款的癮頭我看濟矣！

阿麗：好！好！好！你…你講話三角六尖，罵人閣真紺喙！煞無知看我好運著目空目赤。

阿財：當做我好心去予雷咬，你就毋通予詐騙集團騙甲戇戇覘，錢財損失無地討。

阿麗：心歹無人知，喙歹上厲害，牽拖啥物詐騙集團，啥？詐騙集團？我若親像蹓佇佗位捌聽過呢？（沉思）

阿財：你是十二月食菜頭，六月才轉嗽？今嘛詐騙新聞傳甲滿四界，一通電話敲來，叫你去銀行轉帳，轉來轉去，你的錢財著綴人走矣。

阿麗：無影無跡，接電話就會破財，錢擱會著綴人走，我聽你咧諷古！

阿財：毋但按呢爾爾，若是通知你退稅、信用卡、分期付款愛轉帳，抑是報你著大獎，愛先繳手續費……。

阿麗：啊…毋就咧講我…。

阿財：愛注意，緊敲 165 專線。

阿麗：等咧！我未輸鴨子聽雷~霧煞煞！啥物是 165 專線，講來聽看覓。

阿財：毋捌，我就講予你喙鬚拍結，若是接著可疑的電話叫你去轉帳，先敲 165 反詐騙諮詢專線，問予清楚，錢

財才袂予人拐拐去。

阿麗：烏斫仔貯豆油，幾日仔無看，你當時變甲遮邇有智識？

阿財：電視新聞定定報，咱的詐騙歹名聲，招數百百款，拐人錢財無天良，如今外銷世界第一名！

阿麗：阿娘喂呀！歹名聲放送到全世界攏知，干但我毋知，莫怪險險予人…

阿財：你喔！總講一句：毋通脍貪賤雞籠，咱若儉錢去予別人開，實在是有夠憨！

阿麗：著啦！著啦！好佳哉祖公有致蔭，拄著你這個大貴人，若無我這聲入虎口，無死嘛烏有！

（電話咧噏……）

阿麗：喂~啥貨啦！欲通知我退稅，（吐大氣）攔來矣！

阿財阿麗：細膩無蝕本，一接二掛三查證，緊敲 165 專線。

（0800-018110 反詐騙諮詢專線， 165 反詐騙諮詢專線）

貴人：阿財 貴夫人：阿麗 落台行禮